

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ

372 2009 — 2011 йилларда тўқимачилик саноати корхоналарини янада ривожлантириш ва модернизация қилиш ҳамда маҳаллий ноозиқ-овқат истеъмол товарлари ишлаб чиқаришни кенгайтириш чора-тадбирлари тўғрисида

Ўзбекистон Республикаси Президентининг «Маҳаллий ноозиқ-овқат истеъмол товарлари ишлаб чиқариш кенгайтирилишини рағбатлантириш борасидаги қўшимча чора-тадбирлар тўғрисида» 2009 йил 28 январдаги ПҚ–1050-сон қарорини бажариш юзасидан ҳамда корхоналарни модернизация қилиш, техник ва технологик жиҳатдан қайта жиҳозлаш ҳисобига ноозиқ-овқат истеъмол товарлари ишлаб чиқаришни кўпайтириш ва турларини кенгайтириш учун қулай шарт-шароитлар яратиш ва шу асосида аҳоли бандлигини таъминлаш мақсадида Вазирлар Маҳкамаси **қарор қилади:**

1. Иқтисодиёт вазирлиги томонидан Молия вазирлиги, «Ўзбекенгилсаноат» давлат-акциядорлик компанияси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, шунингдек ноозиқ-овқат истеъмол товарлари ишлаб чиқарадиган корхоналар билан биргаликда ишлаб чиқилган:

2009 — 2011 йиллар даврида республика минтақалари ва «Ўзбекенгилсаноат» давлат-акциядорлик компанияси корхоналари бўйича ноозиқ-овқат

истеъмол товарларининг асосий турларини ишлаб чиқаришнинг мақсадли параметрлари 1, 1а ва 1б иловаларга* мувофиқ;

2009 — 2011 йиллар даврида ноозик-овқат истеъмол товарлари ишлаб чиқарувчи асосий корхоналар бўйича модернизация қилиш, техник ва технологик жиҳатдан жиҳозлаш бўйича инвестиция лойиҳалари рўйхати 2-иловага* мувофиқ маъқуллансин.

2. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари икки ҳафта муддатда 1, 1а, 1б ва 2-иловаларда кўрсатилган мақсадли параметрлар асосида маҳаллий ноозик-овқат истеъмол товарлари ишлаб чиқаришни кенгайтиришнинг ҳудудий дастурларини амалга ошириш бўйича комплекс чора-тадбирларни ишлаб чиқсинлар ва тасдиқласинлар.

3. «Ўзбекенгилсаноат» давлат-акциядорлик компанияси, хўжалик бошқаруви органлари Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, ноозик-овқат истеъмол товарлари ишлаб чиқарувчи корхоналар билан биргаликда 2-иловага киритилган лойиҳаларнинг техник-иқтисодий асосланиши ўз вақтида ва сифатли ишлаб чиқишини ҳамда амалга оширилишини таъминласинлар.

Қишлоқ ва сув хўжалиги, қишлоқ хўжалиги маҳсулотларини қайта ишлаш ҳамда истеъмол товарлари масалалари комплекси Иқтисодиёт вазирлиги, «Ўзбекенгилсаноат» давлат-акциядорлик компанияси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда бир ой муддатда 2-иловага киритилган лойиҳаларнинг техник-иқтисодий асосланишини ишлаб чиқиш жадвалини тасдиқлаш учун киритсин.

4. Белгилансинки, ушбу қарорга 2-иловага киритилган тўқимачилик корхоналарини модернизация қилиш ва техника билан қайта жиҳозлаш лойиҳалари, шу жумладан тайёр тўқимачилик буюмлари ишлаб чиқариш соҳасида янгидан ташаббус кўрсатиладиган лойиҳалар Ўзбекистон Республикаси Ҳукумати номидан Ўзбекистон Республикаси Ташқи иқтисодий алоқалар, инвестициялар ва савдо вазирлиги билан хорижий инвестор ўртасида белгиланган тартибда тузиладиган инвестиция шартномаси асосида амалга оширилади.

Инвестиция шартномасида қонун ҳужжатларида белгиланган шартлардан ташқари божхона тўловларидан озод қилинадиган (божхона расмийлаштируви йиғимлари бундан мустасно) четдан келтириладиган технологик асбоб-ускуналар рўйхати кўрсатилади, шунингдек хорижий инвесторнинг қуйидаги қўшимча мажбуриятлари назарда тутилади:

четдан келтириладиган асбоб-ускуналарни лойиҳанинг техник-иқтисодий асосланишида белгиланган муддатларга қатъий риоя қилган ҳолда фойдаланишга топшириш;

асбоб-ускуналар фойдаланишга топширилган кундан бошлаб икки йил мобайнида ишлаб чиқаришнинг лойиҳадаги қувватига чиқиш;

* 1-2-иловалар рус тилидаги матнда берилган.

тикув-трикотаж ва тўқимачилик ишлаб чиқаришларнинг ишлаб чиқариш қувватини беш йил мобайнида камида 70 фоиз, калава ишлаб чиқариш қувватини камида 85 фоиз даражасида сақлаш;

ишлаб чиқариладиган маҳсулотнинг камида 70 фоизини экспортга сотиш;

янги иш ўринлари ташкил этиш.

Хорижий инвестор ва Ўзбекистон Республикаси Ташқи иқтисодий алоқалар, инвестициялар ва савдо вазирлиги томонидан имзоланган инвестиция шартномаси Ташқи иқтисодий алоқалар, инвестициялар ва савдо вазирлиги томонидан уни тасдиқлаш тўғрисида Ҳукумат қарорини қабул қилиш учун Ўзбекистон Республикаси Вазирлар Маҳкамасига киритилади.

Тузилган инвестиция шартномаси шартлари хорижий инвестор томонидан бажарилмаган тақдирда имтиёзлар ва преференциялар берилиши натижасида бўшаган маблағлар тўлиқ ҳажмда давлат бюджетига ундирилади.

5. Ўзбекистон Республикаси Ташқи иқтисодий алоқалар, инвестициялар ва савдо вазирлиги инвестиция шартномаларини Ўзбекистон Республикаси Ташқи иқтисодий алоқалар, инвестициялар ва савдо вазирлиги ҳузуридаги энгил саноат корхоналари куриш, уларни қайта ихтисослаштириш ва модернизация қилишга доир таклифларни кўриб чиқиш бўйича Идоралараро эксперт кенгашининг «Ўзбекенгилсаноат» давлат-акциядорлик компанияси ва «Ўзенгсанлойиха» масъулияти чекланган жамиятнинг асбоб-ускуналарнинг сифатли, рақобатбардош ва экспортга йўналтирилган маҳсулот ишлаб чиқаришни таъминлайдиган техник параметрлари тўғрисидаги тегишли хулосалари асосида қабул қилинган ижобий қарорини ҳисобга олган ҳолда белгиланган тартибда тузсин.

6. Ўзбекистон Республикаси Ташқи иқтисодий алоқалар, инвестициялар ва савдо вазирлиги ҳузуридаги энгил саноат корхоналари куриш, уларни қайта ихтисослаштириш ва модернизация қилишга доир таклифларни кўриб чиқиш бўйича Идоралараро эксперт кенгаши Вазирлар Маҳкамасига ушбу қарорга 2-иловага мувофиқ 2009 — 2011 йиллар даврида тўқимачилик корхоналарини модернизация қилиш ва техник жиҳатдан қайта жиҳозлаш бўйича инвестиция лойиҳалари рўйхатига янги лойиҳаларни киритиш ёки лойиҳаларни маъқулланган рўйхатдан чиқариш бўйича таклифлар киритсин.

7. Қўйидагилар:

Ўзбекистон Республикаси Президентининг «Маҳаллий ноозиқ-овқат истеъмол товарлари ишлаб чиқариш кенгайтирилишини рағбатлантириш борасидаги қўшимча чора-тадбирлар тўғрисида» 2009 йил 28 январдаги ПҚ–1050-сон қарорига мувофиқ уларга нисбатан божхона божларидан озод қилиш бўйича имтиёзларнинг амал қилиши жорий этиладиган (божхона расмийлаштируви йиғимлари бундан мустасно) ноозиқ-овқат истеъмол товарлари ишлаб чиқаришга ихтисослаштирилаётган корхоналар томонидан рес-

публикада ишлаб чиқарилмайдиган импорт қилинадиган бутловчи буюмлар, хом ашё ва материаллар рўйхати 3-иловага* мувофиқ;

Ўзбекистон Республикаси Президентининг «Бухоротекс» ОАЖни модернизация қилиш ва техникавий қайта жиҳозлаш чора-тадбирлари тўғрисида» 2008 йил 18 февралдаги ПҚ–798-сон қарорига мувофиқ «ДЭУ Текстиль Бухоро» хорижий корхонаси томонидан ўзининг ишлаб чиқариш эҳтиёжлари учун келтириладиган ва божхона тўловларидан озод қилинадиган (божхона расмийлаштируви йиғимлари бундан мустасно) янги технологик асбоб-ускуналар, эҳтиёт қисмлар, техник жиҳозлар, бутловчи буюмлар, материаллар ва бошқа моддий ресурслар рўйхати 4-иловага* мувофиқ тасдиқлансин.

8. Ўзбекистон Республикаси Президентининг «Хорижий сармоя иштирокидаги корхоналар томонидан гайёр истеъмол моллари ишлаб чиқаришни кўпайтиришни рағбатлантиришга оид кўшимча чора-тадбирлар тўғрисида» 2003 йил 23 июндаги ПФ–3267-сон Фармонида назарда тутилган имтиёзлар «Ўзбекенгилсаноат» давлат-акциядорлик компаниясининг корхоналари томонидан импорт қилинадиган товарлар бўйича акциз солиғи тўлашга ҳам татбиқ этилиши маълумот учун қабул қилинсин.

9. «Ўзстандарт» агентлиги:

«Ўзбекенгилсаноат» давлат-акциядорлик компанияси, манфаатдор хўжалик бошқаруви органлари билан биргаликда бир ой муддатда ноозиқ-овқат истеъмол товарлари ишлаб чиқарувчи корхоналарда сифатни бошқариш тизимлари жорий этилишининг жорий ҳолатини пухта ўрганиб чиқсин;

уч ой муддатда ноозиқ-овқат истеъмол товарлари ишлаб чиқарувчи ҳар бир корхонада ва хўжалик бошқаруви органларида сифатни бошқариш тизимларини жадал жорий этиш юзасидан кўшимча комплекс чора-тадбирлар ишлаб чиқсин;

кўрилган чора-тадбирларнинг натижалари тўғрисида 2009 йил 1 ноябргача Ўзбекистон Республикаси Вазирлар Маҳкамасига ахборот берсин.

10. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари Р.С. Азимов зиммасига юклансин.

**Ўзбекистон Республикасининг
Бош вазири**

Ш. МИРЗИЁЕВ

Тошкент ш.,
2009 йил 20 август,
236-сон

* 3-4-иловалар рус тилидаги матнда берилган.